



## 氣象報導

天殄殄仔光，阿球的爸爸開電視咧看透早的新聞，新聞內底，穿甲嬌噹噹的記者咧報講，今仔日有百分之三十落雨的機會，有時烏陰，有時陣雨……。

阿球頭昏昏，目睺sa-bui-sa-bui，拄予個媽媽對(ui)眠床挖起來，連揣便所坐踎馬桶的氣力都無，擰齒抵擠(tsik)齒膏的動作，看起來嘛懶屍懶屍；目睺看頭前都無夠，哪會有心情去看外口咧？而且，這馬是早起六點半，無斟酌(tsim-tsiok)看，定著分袂清是天拍殄仔光，抑是外口咧變天。橫直，哪會有予人對(ui)燒烙燒烙的棉襪被(mî-tsioh-phuē)內底換(giú)起來了後，心情會是好天的咧？佇阿球心不甘情不願的心內，逐工早起攏嘛烏陰天。

阿球逐工透早目睺猶袂褌(thí)開，耳空著會聽到個爸爸咧看電視新聞的聲，伊心內定定想講，彼(he)記者穿甲遐(hiah)爾嬌，笑甲若出大日頭咧，攏嘛是咧騙人的，個是欲予人看著個的笑容了後，心情會當變較好的是無？抑是個家己咧笑歡喜的？總講一句，逐工早起，阿球的喙，攏嘛翹甲十二尺懸，看啥物都袂慣勢，伊的心情是烏陰兼大雨，莫透風颯，就土地公(thóo-tī-kong)保庇--looh！

佇馬桶坐禪(tsē-siân)兼啄龜五六分鐘，阿球個媽媽發見伊無動無靜。斟酌聽，無聲，無聲，閣無聲，閣是無聲。忽然間，阿球大聲叫一聲，敢若起火燒厝全款。原來，阿球規個人，因為閣暈暈去，身軀煞軟kô-kô，倒拗，窰入去馬桶內底。個媽媽透早趕欲上班，血壓就已經夯(giâ)較懸淡薄仔，這聲，看著阿球規個人窰牢咧，也好氣也好笑，無救伊嘛袂使，而且，阿球閣是伊的心肝仔困。是講，救人較要緊，無人佇遐爾仔緊急的時陣，閣咧磅血壓，準若有，伊的血壓可能早就衝(tshìng)到百六去--looh！伊上煩惱的是，阿球的骨頭是毋是會去予折著。伊心臟驚一下煞強欲定去。

平常時仔恰阿球若冤仇人的姐姐，看著這齣好戲，笑三聲，大笑一聲。予個媽媽gîn一下，笑聲煞擋佇喙裡，變做雞娃仔面，忍袂牢(tiâu)，閣爆(pók)出三聲。然後，百般無奈，早頓清彩扒扒咧，驚去掃著風颯尾，出門去--looh。伊想講，橫直厝裡有大人(tuā-lâng)佇咧，安啦，而且，平常時仔伊就看阿球足鑿目(tshák-bák)的，這聲，掠著機會，會當報一下仔烏鼠仔冤咧，當然愛緊去學校共伊鬥宣傳一下，伊連開門，就感覺門扇板若喙脣咧開喙笑哈哈，關門就感覺是門扇板咧偷笑，門póng一聲，敢若是咧替伊放炮慶祝全款，鼻著外口的空氣，感覺有消敵多年的厭氣，精神清爽想欲飛的感覺。總講一句，今仔日的空氣，對伊來講，若像特別清涼清芳。若斟酌(tsim-tsiok)看，伊袂輸尪仔冊內底，蹓佇森林內底，無憂無愁，歡歡喜喜的公主全款，逐步嘛離地三公分，那跳那行，那行那

笑，笑規路的，伊誠久毋捌遮爾仔歡喜矣。路裡毋知的人，可能會叫啊伊是去食毋對藥仔咧。毋過，伊擺若像無看著別人全款，伊心內，干焦想著……阿球、馬桶……哈！哈！哈！

阿球個爸爸嘛雄雄袂當閣看電視新聞--looh，緊飛去救阿球，毋過面腔誠歹看。窒佇馬桶內底的阿球，看著個爸爸的面腔，激佇心內萬年的狗屎都提起來哺，伊已經對個爸爸有意見誠久矣，忍袂牢，目屎就輾(lìn)落來。伊捌懷疑個爸爸愛看早起的新聞，是因為內底的記者較嬌，講話嘛較好聽，笑眯眯閣看起來誠有禮貌，予個爸爸規工的心情擺自按呢清爽起來；伊懷疑個爸爸是去sannh著遐的記者；伊嘛懷疑，個爸爸根本無關心個。

這嘛袂當怪阿球個爸爸，啥人(síang)叫阿球個兜逐工早起的狀況，若親像一tsân火燒厝拍火的新聞咧。阿球逐工早起，擺若像身在著焰火的厝內底咧閃烏煙全款，目調禡(thí)袂開，身軀倚貼佇壁邊壁跂壁角用摑(lu)的，面布搵(ùn)澹會掩(am)佇面裡幾若分鐘，若像咧提防烏煙衝著傷全款，毋過，大部份的時間，伊規个人較sîng早就予烏煙衝甲袂振袂動死死昏昏去矣。拍火隊長，就是阿球個媽媽，伊會一直喝「緊咧！緊咧！借過一下……」，規隊的人，其實隊員嘛才阿球個三个爾爾，擺愛聽伊的命令做動作。這聲，今仔日早起，伊毋但著拍火，閣愛另外出勤務。捌看過新聞咧講，在額的消防人員，有時愛掠蛇，損蜂岫，救貓仔狗仔。這馬阿球個媽媽今(tann)著一引救窒佇馬桶內底的猴死囚仔，閣愛一引聽看鬧熱的人，就是阿球個爸爸，佇邊仔怨東怨西，講人找伊的麻煩，害伊無看新聞。

窒佇馬桶內的阿球，含(kâm)著目屎，閃出一寡仔歹勢俗萬分委屈的目神，伊心內想講，是伊較重要，抑是看新聞較重要，抑是記者較重要，上無，厝裡的馬桶，逐工著愛用著，嘛比新聞較重要講。想到遮，阿球的心情，隨變烏陰天，驚惶的面頂，兩逝(tsuā)足大港的目屎，直直濺(tsuānn)落來，是百分之百的落雨天，閣聽著爸母咧霆雷公……這是啥物天啊？

誠無簡單，阿球個爸爸媽媽才共阿球對(uì)馬桶換出來，好佳哉，干焦左引的尻川phuê小可仔遛皮(liù-phuê)爾爾，洗洗咧，拭(tshit)焦了後，面速力達母(biān-soo-lí-táng)抹抹咧，就無代誌。阿球一陣(tsūn)驚惶了後，猶含(kâm)著目屎，喙齒清彩lù-lù咧，喙烏白漉漉(lók)咧，面巾三兩下huê-huê咧，就去坐咧食早頓，阿球的爸爸當然是行轉去客廳，繼續看伊的新聞，個媽媽繼續拍火，趕個爸仔困緊款款咧，食食咧，伊通好收碗箸，伊趕緊欲洗碗，上班袂赴矣！

阿球食個媽媽特別為伊攢(tshuân)的牛奶泡「玉米脆片」，果子味的，有草莓、柑仔、王梨、芳瓜、葡萄，五花十色，啥物色都有，誠艷麗，若親像天頂的虹全款。阿球一看著，心花就綴咧開囉，根本已經共拄才的馬桶事件袂記得了了矣！

外口嘛有較光焱(iānn)--looh！天公伯仔，若親像睏醒共目調禡開--looh！毋過，真正像電視的氣象阿姨報的全款：好天，有時烏陰，有時陣雨……外口落綿綿仔雨，閣有出日頭óo！

阿球個媽媽擗一枝雨傘予伊，拄好是五百萬的，啥物色都有，拄才，阿球是用偷笑的，驚予個講伊是船過水無痕，毋過這擺，雨傘一禡開，伊就歡喜甲擋袂牢，伴著笑聲，喝出喙。

「哇！我共天頂的虹擗佇手裡……」

「好矣！莫拖矣！欲袂赴矣！緊咧！」



一出門，阿球就看對(ui)天頂去。「哇！真正出虹矣呢！足嬌的！」

行佇路裡，閣愈趣味；因為是落綿綿仔雨，有沃著嘛沃袂澹，誠濟因仔人，若無看著大人，雨傘就是上好的迤迤物仔，會當做寶劍，會當做鼓槌，準若有撐雨傘的，嘛是有撐若無撐咧，會那擰那輓(liàn)手裡的雨傘，規條路若一條長長長的彩帶，若一座大大小小的花園，佻仔鬧熱咧。阿球一下仔看天頂，一下仔看邊仔。

「哇！天頂的虹攏下凡來矣！全世界攏是虹！」

當咧歡喜的時，阿球的目睷飄著路邊……

「欸(ě)?樹仔本底是草仔色，是按怎變做七彩色咧？」

伊閣共頭向(àn)落去看塗跂……

「欸?打馬膠路，本底毋是烏烏烏的色?是按怎……是按怎……若親像鋪七彩的地毯咧？」

伊閣對(ui)塗跂開始巡懸看起來……伊的鞋仔，伊的褲，伊的衫……伊閣偷偷仔共褲頭的糾帶小換(giú)開，偷偷仔探一下仔內褲。

「哇！哇！哇！哪會按呢?哪會按呢？」

路裡的建築，哇！逐棟攏變彎彎，變做七彩色。阿球閣看對(ui)正片的樹仔，樹仔頂那會臨時發(puh)出遐爾濟果子，閣排甲好勢仔好勢：蘋果，柑仔，弓蕉，菝仔，葡萄三葩，嘛若虹咧。阿球閣看對(ui)倒片的電火柱仔，哪會變做一節一節，毋是痞色的？

「一二三四五六七，哇！哇！哇！」阿球大叫三聲，一聲比一聲閣較大聲。

「哇！哇！哇！」閣叫三聲，一聲比一聲閣較細聲。「這是啥物所在，我佇佗位?救人ooh……」

這個時陣，電火柱的頂懸，有一隻烏鷺形的七彩鳥，伊唱講：「阿球，阿球，緊來救；阿球，阿球，鬥跤手。」

阿球聽著聲，驚一下，想講烏仔那會講人話咧，那會干焦伊聽會著烏仔咧講人話咧，毋過死馬當活馬醫，阿球只好問伊講：「你本底是烏烏，是按怎變做彩色的咧？」

「唉！我嘛誠袂慣勢，紅嬌，烏大範，這彩色的，顧我怨啦。我傷歹矣！佇遮佔地盤，看有人行過，我就啄人的頭，我知影毋著矣，看人袂慣勢是家己的修養無夠，我實在傷厚懷疑(giâu-gí)矣！拜託你，我已經等你誠久--looh，干焦你會當救我。」

「啥物?我只是一个因仔人，我那會知影欲按怎救你？」

「你愛共樹仔頂的果子挽落來，園跔冊包內底，了後，你愛根據逐項果子的特性，發好心做一寡好代誌，愛歡喜做甘願受，毋通像我疑心生暗鬼。而且，你愛較骨力咧，佇厝裡，佇學校，攏袂當閣貧惰款，這個世界才會當變轉來原本的色，拜託你，阿球，只要有心做，你一定做會到。救我抑是救別人，就是救你家己，救這個世界。拜託你，毋通袂記得ooh！」

阿球心內有淡薄仔懷疑，毋過伊猶是共果子按樹仔頂挽落來，園入去冊包內底，行佇七彩的路裡，去到學校。伊驚講是家己閣咧陷眠，一到學校，伊就問同學。

「阿芬，我共你考試，我穿的衫是啥物色？」

「白色。」

「我穿的褲是啥物色？」

「紺(khóng)色啊！你足無聊的liooh！你出的題目傷簡單矣，歹要，我毋愛插(tshap)你矣，我欲來去迤迤矣，你去揣別人佻你要！」

「奇怪，是按怎干焦我看著的物件變做七彩色咧？」阿球一直咧想七彩烏鶯講的話，嘛毋敢共這個秘密講予別人聽，驚別人會共伊恥(thí)笑。攏無人看著七彩的色，若共老師報告嘛無路用，暫時先照七彩烏鶯講的來做看覓。伊心內只好想講，欲按怎共冊包仔內底的果子銷出去較好。

彼工中晝，阿球就共蘋果洗洗咧，拄好阿添胃腸無好，阿球佇厝捌聽個媽媽講過，蘋果內底的酵素(kànn-sò)，會當予tīng屎變軟(ńg)，軟屎變tīng。

「阿添，這粒蘋果予你食，顧胃腸。」

「多謝你！阿球，這粒蘋果若虹的紅色彩，足嬌的。紅紅，若一粒愛心，予我感覺你誠有溫情。」

這時陣，阿球嘛感覺有影--lih！心內誠歡喜，歡喜甲若親像佇虹頂懸跳舞全款，阿添的呵咾就是上美妙的配樂。

阿球便當食了，就提出彼粒柑仔，剝開了後，內底拄好十四瓣，伊看有七个查某同學無果子通食，就一人分兩瓣予個，那分那解釋。

「聽講，柑仔有誠濟維他命，食了會當予恁嬌嚙嚙ooh！誠甜ooh！請恁食！」

「多謝你，阿球，這柑仔一瓣一瓣彎彎，足嬌的，親像天頂的虹的柑仔色。」

這時陣，阿球嘛感覺有影ooh！伊心內閣較歡喜，歡喜甲若親像佇虹頂懸跳舞全款，這七个查某同學，袂輸七仙女全款。

阿球越(uat)頭看著阿娟，伊那會家己坐佇遐咧流目屎咧，桌頂空空，看無便當篋仔。

「阿娟，你是按怎？」

「阮媽媽去較遠的所在，可能是趕袂赴共我送便當的款，我腹肚枵甲擋袂牢矣。」

「無要緊，這jí弓蕉予你食，伊有誠濟熱量，會當予你擋甲下晡喔！」

「多謝你，這弓蕉彎彎彎，袂輸虹的黃色彩全款，看著猶袂食著，精神就攏來矣！」

這時陣，阿球嘛感覺有影喔！伊閣愈歡喜，歡喜甲若親像佇虹頂懸咧飛全款，阿娟若坐佇雲做的膨椅頂懸，大聲咧共阿球拍嘆(phók)仔，是現場上蓋專業的觀眾朋友。阿球的目神充滿自信，雙手擰懸懸咧iat手，若像對家己的演出誠滿意，咧多謝逐家的捧場！

阿球向(ànn)頭看家己的衫褲！真正有部分變轉去原本像白雲的白色，像藍天的紺色矣！阿球心內暗暗仔想講，咧欲好天矣！原來，替人設想佢人分享有遮爾偉大的力量，因佢人嘛做會到。伊閣較欲信七彩烏鶯的話，閣較有信心，相信小小的溫情，會當予這個世界袂孤單，會當救這個世界，予世界無全色！

放學了後，阿球行轉去厝裡，路裡的色緻嘛無全款矣！電火柱頂的烏鶯，一半烏，一半彩色，笑笑咧講：「阿球，阿球，共我救；阿球，阿球，誠優秀。」閣甲阿球使一下仔目尾，若像咧共說(sueh)多謝，叫伊愛繼續拍拚。

轉去厝裡的時，阿球驚個媽媽會煩惱伊的果子是對(ui)佢位來的，驚伊去予人毒(thāu)著，伊就共個媽媽講：「我用家己的四秀仔錢買一粒菝仔佢三葩葡萄，我想欲請恁食，多謝恁早起共我對(ui)馬桶內底救出來。若無恁，我毋知欲予水沖(tshiàng)去佢位咧？」

「乖！你誠有心！暗頓食煞，果子就交予你攢(tshuân)喔！」

暗頓了後，逐家開電視看氣象報導，阿球共菝仔切做一周一周，排蹠phiat仔內底，閣共三葩葡萄按色緻的深佢淺排甲彎彎彎。伊拚(phâng)出來的時，個彼个愛看新聞的爸爸，彼个若冤仇人的姐姐，彼个像拍火隊長的媽媽，攏無啥相信阿球會遐gâu，保證無代先鬥空ooh！個逐家做伙喝講：「哇！彎彎彎，袂輸若虹的草仔色佢紺(khóng)色全款，攏足嬌的！」



這時陣，阿球歹勢閣兼歡喜，伊感覺伊是世間上，上蓋幸福的人，若親像伊倚佇天頂七彩的虹頂懸，予人掛冠軍的獎牌，披七彩的彩帶，正手閣比出勝利的手勢。雖然伊是厝裡上細漢的，定共個揣麻煩，定予個罵，毋過細漢因仔會當鬥做細頂的，有心做好毋免分大細件tsân，這擺，阿球真正歡喜甲佇客廳跳舞惹玲瓏。電視內底嬌嬌的記者，這擺阿球有影感覺個誠嬌ooh！拄好咧報氣象。

「明仔載，出大日頭，無落雨的機會……」

阿球大聲叫一聲。

「哇！」

含(kâm)著笑聲，阿球閣大聲叫一聲。實在無人看會出，伊是咧歡喜啥，毋過逐家看伊的目神擺誠溫柔，無像早起的拍火樣，是若像佇山頂開講泡茶，心清幽仔清幽。

「哇！誠好，誠好，日頭出來矣！好天矣！連綿綿仔雨嘛無去矣！明仔載袂烏陰天矣！逐工擺袂烏陰天矣！」

「無--nò，無咧逐工好天啦！心情有好天較重要。我逐工早起看新聞，就是驚天氣多變化，驚恁去予雨沃著。」阿球個爸爸笑笑仔咧講。

阿球一聽著，發覺原來個爸爸是去予伊冤枉著，伊就跳倚去共個爸爸攬(lám)咧，伊的目睭若像小可仔燒燒，驚予厝裡的人看著歹勢，伊就假影看對(ui)外口去。天已經暗矣，烏鶯嘛已經飛轉去伊的岫(siu)矣，準若閣佇遐，嘛定著是烏烏看無！阿球閣看對(ui)個爸爸去，個爸爸笑甲誠歡喜，目睭內干焦有阿球伊，無咧看電視；阿球的姐姐，拚性命食菽仔配葡萄吐葡萄子，想欲變予嬌嬌嬌；個媽媽閣全款是拍火隊，毋過笑咪咪，呵啫阿球誠古錐。

「緊咧，緊咧，通寫功課矣！我欲緊來去洗碗箸！」

「無問題！隨來！」

「欸？今仔日誠骨力--ooh！」

阿球個爸爸共電視關起來，去灶跤倒兩杯滾水，一杯家己欲啣，一杯欲予阿球。阿球有小影一下，是清的，無色的。伊就安心矣。伊的目睭嘛閃出比水較清明的目神，佢個爸爸笑咪咪相對看……

## 創作理念

表象不等於真象，生命由自己定義。初為光鮮雀躍的彩虹，顛覆為阿球的麻煩，冷淡的父親，實則日日關懷。馬桶事件如人生意外，黑色烏鶯如考驗，是困境幽默與美學。承認意外及困境的存在本質，轉念向上向善，心就自由。

天氣、鳥類、食療的自然觀察，喚起樂活人生。

烏鶯的擬聲，創造音韻趣味；色彩及水果的融入，導引色彩與生活事物的認知及對應。

省思現代家庭及校園的人際互動及性別平權概念。

探討職業生涯：記者、消防員、教師、職業婦女。

鼓勵行善服務，正向思考。小善可成溫情改變世界，小兵立大功，要看重自己。

## 王秀容

臺北縣本土語言指導員、臺北縣鄉土語文輔導團團員  
臺北縣立五峰國中教師

